



IL DOSSIER D'ANNUNZIA

Per s'annunziar cun success, vali da planisar bain la candidatura e da metter ensemen cun quità in dossier d'annunzia. Quai augmenta las schanzas da vegnir envidà ad in discurs da preschentaziun. Il dossier d'annunzia sa cumpona per regla da la brev d'annunzia, dal curs da vita, d'attestats da lavur e da scola sco er d'eventualas referenzas.

La brev d'annunzia

La brev d'annunzia, er numnada brev da motivaziun, duai svegliar l'interess per Vos resp. per Voss profil. Quai schais Vos, pertge che Vos As interessais per la piazza publicada e tge che As qualifitgescha per questa lavur. Mussai, pertge che Vos essas adattada u adattà per questa piazza. Scrivai per mintga inserat da piazza ina brev individuala.

Cuntegn

As referai a l'inserat da la piazza e descrivai las suandantas chaussas en la brev:

- Introducziun: Co e cura essas Vos vegnida u vegnì a savair da la piazza? Avais Vos forse già gi in emprim contact per telefon?
- Part principala: Voss interess, Vossas cumpetenzas centralas e particularitads
 - Tge As interessa spezialmain vi da la piazza e vi dal manaschi? Mussai, che Vos chapis tge ch'il manaschi fa.
 - Cumpetenzas centralas: Menziunai, pertge che Vos essas la dretga persuna per la piazza. Tge è Vossa motivaziun per exactamain questa piazza, tge abilitads avais Vos spezialmain per questa lavur?
 - Avais Vos particularitads / extras a favur da l'interpresa? P.ex. savair d'insider, contacts interessants, enconuschientschas linguisticas spezialas e.u.v.
- Frasa finala: Exprimi Voss giavisch da vegnir envidada u envidà al discurs da preschentaziun. Menziunai che Vos As legrais d'ina invitaziun ad in discurs personal. Vos pudais er exprimer Voss interess d'emprender d'enconuscher personalmain l'interpresa ed il team.

Tips

- La brev d'annunzia duess sche pussaivel avoir lieu sin ina pagina A4.
- Sche Vos avais absolvì ina carriera professiunala pli lunga, menziunai mo quellas experientschas che van a prà cun la piazza. Betg repeter datas. Quellas figureschan già en il curs da vita.
- Personas giuvnas creschidas pon descriver pli detagliadamain lur experientschas.
- A tgi drizzais Vos Vossa annunzia? Al superiur futur u a la partiziun da HR? Tscherni in vocabulari adattà al destinatur. Duvrai plinavant ils chavazzins ch'èn vegnids duvrads en la publicaziun da la piazza.
- Evitar en mintga cas: Remartgas negativas, per exempel davart ina piazza anteriura, davart superiors da pli baud u davart in collega d'ina giada.
- As laschai inspirar d'exempels en l'internet, ma evitai flosclas e frasas da standard. Personalisai texts dad AI, empè da surpigliar quels in ad in.
- Sche pussaivel evitar il cundizional (avess, fasschess, pudess).
- Legiai a la fin u pli tard anc ina giada Vossa brev e la dai ad insatgi per laschar leger tras.

Il curs da vita / CV

Il curs da vita infurmescha en furma concisa davart Vossa persona e davart Voss profil. Spetgada vegn in'enumeraziun tabellarica cumpletta da las activitads da scola e professiunalas da fin ussa. Per regla cumpiglian ils curs da vita ina fin duas paginas (per part fin trais paginas), tut tenor las experientschas fatgas.

Persunalias

- Num, prenum
- Adressa
- Telefon
- Adressa dad e-mail
- Data da naschienscha
- Naziunalitad e lieu d'origin, resp. permissiun da dimora (facultativ)
- Stadi civil, uffants cun annada (facultativ)

Experienscha professiunala

- L'occupaziun la pli actuala sisum, lura enumerar enavos fin l'ultima, incl. mais ed onns
- Inditgar la funcziun / il gener da l'activitad, la firma ed il lieu
- Las activitads principalas, las incumbensas e las cumpetenzas pon vegnir menziunadas
- Las activitads professiunalas duessan vegnir documentadas cumplettaimain cun attestats
- Largas en il curs da vita duessan vegnir evitadas, quai cun mussar questas fasa da la vita en il curs da vita. Talas fasas èn p.ex. segiurns per emprender ina lingua, viadis, incapacitad da lavurar, dischoccupaziun e.u.v.

Scolaziun e formaziun supplementara

- La scolaziun la pli actuala sisum, lura enumerar enavos fin l'ultima, incl. mais ed onns
- Las personas ch'entran en il mund da lavur ston preschentar detagliadamain lur carriera da scola.
- Sche la fin da la scola è stada gia avant pli ditg, tanschan las suandantas indicaziuns:
 - Designaziun da la scola (gimnasi, scola secundara, scola primara), lieu da la scola; designaziun dal diplom, manaschi d'emprendissadi resp. scola/instituziun da scolaziun
- Curs pon vegnir inditgads tenor temas, uschenavant ch'els èn relevants per la piazza.

Enconuschientschas da linguas

- Enumerar las linguas maternas ed estras ed inditgar las enconuschientschas respectivas.
 - Enconuschientschas da basa, bunas enconuschientschas u fitg bunas enconuschientschas
- Certificats da lingua e segiurns per emprender ina lingua duessan medemamain vegnir enumerads, sche avant maun.

Enconuschientschas ed interess

- Far ina glista da las enconuschientschas dad IT incl. il nivel.
- Activitads en uffizi d'onur pon vegnir menziunadas.
- Hobis pon vegnir menziunads, sch'els van a prà cun la piazza u sch'els accentueschan tschertas abilitads.

Referenzas

- Inditgar mo personas da referenza che san valitar las cumpetenzas professiunalas actualas.
- Dumandar ordavant il consentiment da las personas da referenza.
- Sin dumonda pon las datas da referenza er vegnir consegnadas posteriuramain.

Concepziun

- Fotografia professiunala d'annunzia en il curs da vita u sin il fegl da titel.
- Chargiar giu il model da Word gratuit ord l'internet. Attenziun: Duvrar il model svizzer!
- Avunda spazi tranter las lingias, ina scrittira bain legibla, ina grondezza agreabla da la scrittira, ina structura survesaivla, betg surchargiar la pagina.

- Facultativ: Metter icons cun cleras finamiras ed en moda chapavla (ev. cun ina noziun appartegnenta).
- Il layout sto ir a prà cun Vus, cun la firma e cun la branscha sco er cun Vossas abilitads tecnicas.

Exempels e models

Exempels e models per la brev d'annunzia e per il curs da vita chattais Vus online, per exempel sin www.jobscout24.ch u www.jobs.ch.

Las agiuntas: Attestats e diploms

Las activitads professionalas che vegnan descrittas en il curs da vita, èn da documentar senza interrupziun cun attestats da lavur. Agiuntads pon er vegnir attestats da scola e diploms da scolaziuns e da furmaziuns supplementaras. Per diploms esters èsi da trametter er las reconuschientschas correspondentas, sche avant maun. Pensai da consegnar copias dals attestats e betg ils documents originals.

L'annunzia online

Adina pli savens vegn il process d'annunzia fatg online. Quai vul dir, che Vus stuais emplenir in formular online cun Vossas persunalias e chargiar si Voss documents d'annunzia. In'autra pussaivladad è l'annunzia per e-mail. Impurtant èsi da sclerir ordavant, en tge furma che l'annunzia vegn pretendida, per il pli è quai inditgà en l'inserat.

Er tar l'annunzia online èsi impurtant da proceder cun quità, da far atenziun ch'i na dettia betg sbagls ortografics e che tut ils documents vegnian tramess. Ultra da quai duessan ils documents che vegnan consegnads sco PDF avair nums expressivs, sco p.ex. Curs da vita_PrenumNum.

Glista da controlla per la spediziun per e-mail

- Da: Duvrar in'adressa dad e-mail seriusa, p.ex. prenum e num (nagins nums da fantasia)
- A: Trametter a l'adressa correcta persunalisada (naginas info@)
- Object: Tscherner in titel expressiv p.ex. Annunzia da prenum num sco commerziant tecnic EP (cunzunt impurtant tar firmas pli grondas)
- Cuntegn: Stimada dunna / Stimà signur
Agiuntà survegnis Vus mia annunzia per la piazza publicgada da Vus sco «...».
Jau ma legrel sin in discurs persunal da preschentaziun.
Salids amicabels
Prenum Num
- Signatura dad e-mail cun tut las datas da contact (prenum, num, adressa, numer da telefon, adressa dad e-mail)
- Naginas formataziuns en il e-mail, perquai che quellas na pon eventualmain betg vegnir preschentadas dals programs dad e-mail dals retschaviders.
- Agiunta:
 - Tut las agiuntas menziunadas èn avant maun ed èn ordinadas, p.ex. feagl da titel, brev d'annunzia, curs da vita, attestats da lavur, diploms e.u.v.
 - Max. 3 agiuntas (gruppar las agiuntas raschunaivlamain)
 - Ils nums da datotecas da PDF èn expressivs, p.ex. Curs da vita_PrenumNum
 - Grondezza d'ina datoteca: maximalmain 2-3 MB per agiunta
 - Trametter senza zippar
- Trametter in e-mail d'emprova a l'atgna adressa
- Betg pretender ina conferma da leger
- Controllar regularmain l'ordinatur da SPAM, sch'ina resposta fiss eventualmain arrivada là

Annunzia spontana

Tut tenor la branscha augmentais Vos Vossas schanzas cun in'annunzia spontana. Per quest intent duessas Vos resguardar intgins puncts: As drizzai adina ad ina persuna da contact. Contactai la persuna responsabla l'emprim per telefon. Vossa annunzia spontana na duessas Vos betg rediger en ina moda memia vasta. Faschai attent che Vos consegnais gugent ulteriurs documents. Impurtant èsi che Vos motivais en la brev d'annunzia, pertge che Vos As annunziats spontan tar questa firma. Rimnai uschè bleras infurmaziuns sco pussaivel davart la firma.

LinkedIn, XING e co.

Tgi che ha in profil da LinkedIn u da XING e vul duvrar quel vinavant, al duess actualisar cun las pli novas activitads ed ils success professiunals u da scola e deponer ina fotografia da profil actuala e professiunala (sumeglianta a la fotografia d'annunzia). Patrunas e patruns utiliseschan questas medias socialas en emprima lingia per obtegnair dapli infurmaziuns da Vos. Perquai poi valair la paina d'actualisar cuntinuadamain l'agen profil. Sche Vos vulais duvrar LinkedIn u XING en moda proactiva per esser visibla u visibel e per stabilir contacts, duessas Vos extender Vossa rait, publitgar content e reagir sin contribuziuns. Cun utilizar chavazzins en il titel sco er en la descripziun persunala, po vegnir meglierada la pussaivladad da chattar il profil. Impurtantas èn ultra da quai datas da contact actualas per As cuntanscher. ► Ulteriurs tips e trics vegnan descrits en il cudesch «Karriere machen mit XING, LinkedIn und Co.» da Silke Grotegut. D'emprestar en il CIP.

IA sco agid

Per il process d'annunzia po l'intelligenza artificziala esser in agid, per exempel per scriver ina brev da motivaziun u per estructurar il curs da vita. Impurtant èsi dentant ch'ils resultats da la IA vegnian mintgamai controllads e sche necessari curregids.

La brev d'annunzia duai esser persunala ed adattada a la piazza respectiva. Cun far la dumonda a ChatGPT po vegnir includida la descripziun da la piazza. En la dumonda (il prompt) pon plinavant vegnir agiuntadas intginas ponderaziuns ch'ins vuless avair en il text. Quai èn agens interess, la motivaziun, experientschas ed arguments, pertge ch'ins giess a prà cun l'interpresa. Il resultat duess silsunter en mintga cas vegnir controllà e curregi.

Er duessan vegnir eliminads ils sbagls tipics dals tools da KI. Quai èn en tudestg per exempel ils «ß» che ston vegnir remplazzads cun «ss». Medemamain la comma suenter il salid «Stimada dunna Muster,».

La IA duess pia plitost vegnir utilisada sco agid e main sco autura suletta da texts. Faschai plinavant atenziun da betg inserir datas persunalas en la IA.

Ulteriuras infurmaziuns

- www.berufsberatung.ch/bewerbung
- www.arbeit.swiss → Publikationen → Broschüren und Flyer → Bewerbung
- www.jobs.ch/de/job-coach
- www.lohnrechner.ch

Ulteriuras infurmaziuns

Fegls d'infurmaziun dal CIP:

- [La tschertga da plazzas](#)
- [Il discurs da preschentaziun](#)

CIP Grischun

Vus vulais ina midada professiunala? Vulais Vos far ina furmaziun supplementara, ma na savais betg exactamain en tge direcziun? Las cussegliastras ed ils cussegliastrs As sustegnan ta concepir Vossa carriera.

- furmaziunprofessionala.gr.ch
- biz@afb.gr.ch